



Број/ Број : 03/4-50-14-4,16/11
Сарајево/ Сарајево: 26. 12. 2011.

KOLEGIJ PREDSTAVNIČKOG DOMA
KOLEGIJ DOMA NARODA
ZAJEDNIČKA KOMISIJA ZA EVROPSKE INTEGRACIJE
KOMISIJA ZA VANJSKE POSLOVE PREDSTAVNIČKOG DOMA
KOMISIJA ZA VANJSKU I TRGOVINSKU POLITIKU, CARINE, SAOBRAĆAJ I
KOMUNIKACIJE DOMA NARODA

IZVJEŠTAJ

s 13. međuparlamentarnog sastanka Zajedničke komisije za evropske integracije PSBiH s Delegacijom Evropskog parlamenta za odnose s Albanijom, Bosnom i Hercegovinom, Srbijom, Crnom Gorom i Kosovom

U Briselu je, 19. i 20. decembra 2011., održan 13. međuparlamentarni sastanak Zajedničke komisije za evropske integracije PSBiH i Delegacije Evropskog parlamenta za odnose s Albanijom, Bosnom i Hercegovinom, Srbijom, Crnom Gorom i Kosovom.

U ime Komisije, sastanku su prisustvovali: Halid Genjac, predsjedavajući Zajedničke komisije za evropske integracije PSBiH, Vesna Krstović-Spremo, prvi zamjenica predsjedavajućeg Komisije, te članovi Komisije Ognjen Tadić, predsjedavajući Doma naroda i Mehmed Bradarić.

Vijeće ministara BiH predstavljala je Nevenka Savić, direktorica Direkcije za evropske integracije BiH.

U ime Misije BiH pri EU, sastanku je prisustvovao Osman Topčagić, ambasador/šef Misije.

U ime Evropskog parlamenta, sastanku su prisustvovali članovi Delegacije za odnose s Albanijom, Bosnom i Hercegovinom, Srbijom, Crnom Gorom i Kosovom: Eduard Kukan, predsjedavajući, Jelko Kacin, zamjenik predsjedavajućeg, Victur Bastinaru, Kinga Goncz, Doris Pack, Tanja Fajon i Jutta Steinruck, i iz Evropske komisije Stefano Sannino, Jonas Jonsson i Simona Gothia.

Za 13. međuparlamentarni sastanak predložen je sljedeći

DNEVNI RED

1. Usvajanje dnevnog reda;
2. Stanje procesa evropskih integracija u Bosni i Hercegovini – razmjena mišljenja između predstavnika Vijeća ministara BiH i visokog predstavnika za vanjsku politiku i sigurnost Evropske komisije;
3. Uticaj regionalnog napretka ka članstvu u Evropskoj uniji, s naglaskom na priključenje Hrvatske EU 2013.;
4. Reforma institucija kroz strukturirani dijalog uz podršku Evropske komisije;
5. Napredak i promjene u sistemu obrazovanja;
6. Ekonomske i socijalne perspektive;
7. Usvajanje zajedničke izjave predsjedavajućih dvije delegacije;
8. Tekuća pitanja;
9. Datum i mjesto narednog susreta.

Eduard Kukan, predsjedavajući Delegacije Evropskog parlamenta, u pozdravnom govoru je istakao da Bosna i Hercegovina, i pored evidentnog zaostajanja u procesu evropskih integracija za zemljama u regiji, još uvijek može uhvatiti korak ispunjavajući preostale uslove iz Sporazuma o stabilizaciji i pridruživanju. Pozvao je bosanskohercegovačke političare, medije i javnost da zajedničkim naporima stvore mogućnost za aplikaciju BiH za članstvo u EU.

Halid Genjac zahvalio se na podršci, razumijevanju i perspektivi koju Bosni i Hercegovini daje Evropski parlament i naglasio potrebu da se na ovom susretu pokuša naći odgovor kako ukloniti blokade i unaprijediti integracioni proces u BiH. Kao najoptimalnije rješenje predložio je izradu Programa integriranja BiH koji će uvažiti složeni sistem nadležnosti u BiH i u svakoj oblasti uspostaviti sistem koordinacije na način da se obaveze uspješno izvršavaju.

Ad.1. Dnevni red usvojen je jednoglasno.

U okviru **2. tačke** dnevnog reda “Stanje procesa evropskih integracija u Bosni i Hercegovini – razmjena mišljenja između predstavnika Vijeća ministara BiH i visokog predstavnika za vanjsku politiku i sigurnost Evropske komisije“, prisutnima se obratio direktor Generalnog direktorata Evropske komisije za proširenje Stefano Sannino koji je istakao da je strategija EU kontinuirana podrška evropskoj perspektivi Bosne i Hercegovine, ali i da se od BiH očekuje da provede presudu Evropskog suda za ljudska prava u predmetu Sejdić i Finci protiv Bosne i Hercegovine, te donese zakone o popisu stanovništva i državnoj pomoći. Podsjećajući na posljednji izvještaj EU o stanju u BiH, koji upozorava na opći zastoj u provođenju reformi zbog političkih blokada, Sannino je naglasio neophodnost da BiH što prije dobije efikasno Vijeće ministara kao osnovni preduslov za nastavak reformskih procesa, kao i da se uspostavi efikasan mehanizam koordinacije unutar BiH.

Nevenka Savić, direktorica Direkcije za evropske integracije BiH, prezentirala je aktivnosti institucija BiH u procesu evropskih integracija u prethodnom periodu i posebno se osvrnula na preporuke Evropske komisije koje je BiH dobila u posljednjem kvartalu ove godine i za koje je Vijeće ministara BiH usvojilo provedbene zaključke. U prvom redu to je Izvještaj o napretku, zatim preporuke sa sastanka strukturiranog dijaloga o pravosuđu i sastanka na visokom nivou o koordinaciji programa IPA-e, ali i evropskih poslova generalno, te na kraju preporuke komesara Fulea za koje DEI priprema Akcioni plan za realizaciju. Jedna od preporuka odnosi se na

poboljšanje koordinacionih mehanizama u pogledu evropskih poslova između Vijeća ministara BiH i parlamenata, kao i parlamenata međusobno.

Iz rasprave koja je uslijedila nakon izlaganja uvodničara izdvajamo apel koji je Doris Pack uputila vođama političkih stranaka u BiH da ožive integracioni proces koji je u proteklih pet godina u stagnaciji, da naprave funkcionalnu državu s funkcionalnim entitetima i stav Halida Genjca i Ognjena Tadića da bi se problematika integriranja mogla efikasno riješiti izradom programa integriranja u kojem bi se političkim kompromisom riješilo pitanje nadležnosti.

U okviru **3. tačke** dnevnog reda "Utjecaj regionalnog napretka ka članstvu u Evropskoj uniji, s naglaskom na priključenje Hrvatske EU 2013.", izlagala je Kinga Goncz. Govorila je o fazama u kojima se nalaze zemlje jugoistočne Evrope. Pristupanjem Hrvatske Evropskoj uniji BiH će najvećim dijelom graničiti s Evropskom unijom i krajnje je vrijeme da BiH, slijedeći primjer uspješnog procesa vizne liberalizacije, ubrza reformske procese i u drugim oblastima, rekla je Kinga Goncz.

Ognjen Tadić poželio je dobrodošlicu Evropskoj uniji na granice Bosne i Hercegovine. Govorio je o tome kako svaka zemlja u regiji ima drugačiji pogled na unutrašnja pitanja od članica Evropske unije kao što je pitanje Kosova za Srbiju i pitanje imena za Makedoniju. Razvijanje nekonfliktnih odnosa unutar BiH za sada se pokazalo uspješnim kada se radilo o manje značajnim problemima i zato je predložio da se primijeni koncept izolacije pojedinačnih pitanja i njihovo rješavanje, naročito kada su u pitanju odluke koje se odnose na reformske procese u BiH. Pomenuo je i zaključak sa posljednje sjednice Zajedničke komisije za evropske integracije kojim se od odgovornih institucija zahtijeva organiziranje kampanje informiranja bosanskohercegovačke javnosti o efektima pristupanja Republike Hrvatske Evropskoj uniji na BiH. Pozvao je EU da se uključi u pregovore BiH i Hrvatske za rješavanje otvorenih pitanja.

U okviru **4. tačke** dnevnog reda „Reforma institucija kroz strukturirani dijalog uz podršku Evropske komisije“ izlagala je Emine Bozkurt. U svom izlaganju Emine Bozkurt posebno je naglasila potrebu reforme pravosudnih institucija u BiH i jačanja pravosudne saradnje između agencija za provođenje zakona i pravosudnih institucija.

Vesna Krstović-Spremo govorila je o strukturiranom dijalogu o pravosuđu između Bosne i Hercegovine i Evropske unije kao o sveobuhvatnoj platformi koja će omogućiti dosljednu i konstruktivnu diskusiju o nedostacima u sektoru pravosuđa i o preporukama Evropske komisije o aktivnostima koje je potrebno preduzeti u institucijama pravosudnog sistema. Na trećem sastanku strukturiranog dijaloga koji će biti održan u proljeće 2012. razmatrat će se izvještaj o provođenju preporuka Evropske komisije.

U okviru **5. tačke** dnevnog reda „Napredak i promjene u sistemu obrazovanja“ Doris Pack je govorila o potrebi unapređenja obrazovnog sistema u Bosni i Hercegovini, problemima verifikacije diploma, postojanja dvije škole pod jednim krovom i modernizacije svih nivoa obrazovanja. Pozvala je parlamente u BiH da izvrše pritisak na vlade da unaprijede obrazovni sistem u BiH.

Mehmed Bradarić istakao je da je jedinstven cilj o kojem se slažu sve grupe u Bosni i Hercegovini - da budućnost njihove djece leži u evropskoj porodici, i da obrazovanje ima presudan značaj za integracioni proces. Iako je BiH predstavljala područje s dobrim obrazovanjem, neophodna je modernizacija svih nivoa obrazovnog sistema radi približavanja razvijenom evropskom sistemu. Problemi koji postoje u obrazovanju u Bosni i Hercegovini jesu

veliki ali nisu nepremostivi. Uz pomoć izvana, kao što je Tempus program Evropske unije koji pomaže u modernizaciji visokog obrazovanja ili u razmjeni studenata, i početkom ekonomskog oporavka u samoj zemlji, može se napredovati uz uslov da obrazovanje ne bude korišteno kao platforma za propagiranje političkih ambicija.

U okviru **6. tačke** dnevnog reda „Ekonomске i socijalne perspektive“ govorila je Jutta Streinruck. U svom izlaganju izrazila je zabrinutost zbog siromaštva u BiH, koje je posljedica globalne ekonomske krize, ali i izostanka neophodnih reformi. BiH je potrebna zajednička ekonomska politika razvijanja malih i srednjih preduzeća, politika zapošljavanja i saradnja poslodavaca s univerzitetima i školama radi profiliranja kadrova potrebnih privredi, istakla je Jutta Streinruck.

Halid Genjac govorio je o makroekonomskim pokazateljima za 2011. i predviđanjima za 2012. u kojoj se očekuje kontrakcija kreditnih aktivnosti, pad unutrašnje potrošnje, pad doznaka iz inozemstva, pad izvoza i smanjenje aktivnosti privrednika van zemlje radi potresa u arapskom svijetu. Razvoj elektroenergetskog sistema i poljoprivrede naveo je kao oblasti koje bi mogle uticati na ublažavanje krize u 2012. godini.

Jelko Kacin rekao je da se, prema njegovom mišljenju, lideri u BiH moraju probuditi i uraditi nešto za svoju posrnutu ekonomiju s poražavajuće visokim brojem nezaposlenih i da ekonomski oporavak nije moguć bez uspjeha u evropskim integracijama. Pozvao je na rješavanje niza praktičkih pitanja kao što su usaglašavanje BiH i legislative EU u tehničkoj, veterinarskoj i fitosanitarnoj oblasti, kao i u pitanjima sigurnosti hrane.

Ad. 7. Poslije završenih izlaganja predložen je tekst Zajedničke izjave, koju su, nakon usaglašavanja, usvojili predsjedavajući dvije delegacije.

Najavljen je sljedeći sastanak koji će biti održan u Sarajevu, u decembru sljedeće godine. Ako Sporazum o stabilizaciji i pridruživanju stupi na snagu, moguće je da se umjesto 14. međuparlamentarnog sastanka održi 1. sastanak parlamentarnog komiteta za stabilizaciju i pridruživanje BiH EU.

Tekst Zajedničke izjave dostavljamo u prilogu.

Predsjedavajući Komisije
Halid Genjac